



家範典第五十六卷

女子部紀事二

宋史太祖本紀魏國長公主褊飾翠羽戒勿復用又教之曰汝生長富貴當念惜福

符彥卿傳彥卿字冠侯周世宗宣懿皇后太宗懿德皇后皆彥卿女也

神宗朱皇后傳后開封人父崔傑早世母李更嫁朱士安后鞠於所親任氏熙寧初入宮生哲宗進德妃哲宗卽位尊爲皇太妃贈崔任朱三父皆至師保

徽宗鄭皇后傳后父紳以后貴累封太師樂平郡王汴京破后至金營訴於粘罕曰妾得罪當行但妾家屬不預朝政乞留不遣粘罕許之故紳得歸后旣行紳亦以是年薨

張永德傳魏人柴翁有女後唐莊宗時備掖庭明宗入洛遣出宮柴翁夫妻往迎之至鴻溝遇雨甚踰旬不能前女悉取裝具計直千萬分其半以與父母令歸魏曰兒見溝旁郵舍隊長項黧黑爲雀形者極貴人也願事之問之乃周祖也父母大愧然終不能奪柴翁好獨寢人傳其能司冥間事一日晨起大笑不已妻問之不對翁好飲其妻逼令飲極醉因漏言曰花項漢作天子矣

古今圖書集成
趙普傳普卒二女皆笄普妻和氏言願爲尼太宗再三諭之不能奪賜長女名志願號智果大師次女名志英號智圓大師

程迥傳迥字可久登進士第歷揚州泰興尉調饒州德興丞唐肅宗時縣有程氏女其父兄爲盜所殺因掠女去隱忍十餘年手刃盡誅其黨刳其肝心以祭其父兄迥取春秋復讎之義頌之曰大而得其正者也表之曰英孝程烈女

荆國大長公主傳公主幼不好弄未嘗出房闥太宗嘗發寶藏令諸女擇取之欲以觀其志主獨無所取

周陳國大長公主傳主幼警慧性純孝帝嘗不豫主侍左右徒跣顙天乞以身代帝隆愛之

徐國長公主傳主母欽成皇后及笄猶處聖瑞宮侍母疾晝夜不暫去藥餌非經手弗以進迨疾革號慟屢絕左右不忍視

孝宗二女傳長嘉國公主紹興二十四年封碩人進永嘉郡主三十二年卒詔以醫官李師克等屬吏孝宗時居東宮奏臣女幼而多疾不宜罪醫遂寢

安康郡主傳主魏惠獻王女也歸殿前司前軍統領羅忠信子良臣詔王府主管鄧從義諭旨皇女孫郡主宜執婦道務成肅雍之德毋敢或違賜甲第居之

周漢國公主傳主理宗女也帝無子公主生而甚鍾愛及笄詔議選尙宰臣請用唐太宗下降士人故事欲以進士第一人尙主遂取周震炎廷謝曰公主適從屏內窺見意頗不懌帝微知之景定二年四月帝以楊太后擁立功乃選太后姪孫鎮尙主擢鎮右領軍衛將軍駙馬都統進封公主爲周國公主帝欲時時見之乃爲主起第嘉會門飛樓閣道密邇宮苑帝常御小輦從宮人過公主第特賜董役官減三年磨勘工匠犒賞有差明年進封周漢國公主拜鎮慶遠軍承宣使鎮宗族娣姒皆推官加封寵異甚渥

張氏傳氏羅江士人女其母楊氏寡居一日親黨有婚會母女偕往其典庫雍乙者從行旣就坐乙先歸會罷楊氏歸則乙死於庫莫知殺者主名提點成都府路刑獄張文饒疑楊有私懼爲人知殺乙以滅其口遂命石泉軍効治楊言與女同榻實無他遂逮其女考掠無實吏乃掘地爲坑縛母於其內旁列熾火間以水沃之絕而復蘇者屢辭終不服一日女謂獄吏曰我不勝苦毒將死矣願一

見母而絕吏憐而許之既見謂母曰母以清潔聞奈何受此污辱寧死筆楚不可自誣女今死死將訟冤於天言終而絕於是石泉連三日地大震有聲如雷天雨雪屋瓦皆落邦人震恐勘官李志寧疑其獄夕具衣冠禱於天俄假寐坐廳事恍有猿墜前驚寤呼吏卒索之不見志寧自念夢兆非殺人者袁姓乎有門卒忽言張氏饋食之夫曰袁大明日袁至使吏執之曰殺人者汝也袁色動遽曰吾憐之久矣願就死問之云適盜庫金會雍歸遂殺之楊乃得免時女死才數日也獄上郡榜其所居曰孝感坊

詹氏女傳女蕪湖人紹興初年十七淮寇號一窠蜂倏破縣女歎曰父子無俱生理我計決矣頃之賊至欲殺其父兄女趨而前拜曰妾雖窶陋願執巾帶以事將軍贖父兄命不然父子併命無益也賊釋父兄縛女磨手使亟去無顧我我得侍將軍何所憾哉遂隨賊行數里過市東橋躍身入水死賊相顧駭歎而去

度宗全皇后傳后幼從父昭孫知岳州秩滿歸至臨安會忠王議納妃臣僚言全氏侍其父昭孫往返江湖備嘗艱險其處貴富必能盡警戒相成之道理宗乃詔后入宮問曰爾父昭孫昔在寶祐間

沒於王事每念之令人可哀后對曰妾父可念淮湖之民尤可念也帝深異之語大臣曰全氏女言辭甚令宜配冢嫡以承祭祀詔冊爲太子妃

曹脩古傳脩古判杭州沒人多惜之貧不能歸葬賓佐賻錢五十萬季女泣白其母曰奈何以是累吾先人也卒拒不納

郝質傳質字景純在并州與朝士董熙善約爲婚姻熙死家貧無依質已爲節度使竟以女歸董氏朱娥傳娥越州上虞朱回女也母早亡養於祖媼娥十歲里中朱顏與媼競持刀欲殺媼一家驚潰獨娥號呼突前擁蔽其媼手挽顏衣以身下墜顏刀曰寧殺我毋殺媼也媼以娥故得脫娥連被數十刀猶手挽顏衣不釋顏怒盡斷其喉以死事聞賜其家粟帛其後會稽令董皆爲娥立像於曹娥廟歲時配享焉

童八娜傳八娜鄆之通遠鄉建興人虎銜其大母女手拽虎尾祈以身代虎爲釋其大母銜女以去時林栗侍親官其地嘗目覩之已而爲守以聞於朝祠祀之

呂仲洙女傳女名良子泉州晉江人父得疾瀕殆女焚香祝天請以身代刲股爲粥以進時夜中羣

鵲遶屋飛噪仰視空中大星煜煜如月者三越翼日父瘳女弟細良亦相從拜禱良子卻之細良恚曰豈姊能之兒不能耶守貞德秀嘉之表其居曰懿孝

趙氏傳氏貝州人父嘗舉學究王則反聞趙氏有殊色使人劫致之欲納爲妻趙日號哭慢罵求死賊愛其色不殺多使人守之趙知不脫乃給曰必欲妻我宜擇日以禮聘賊信之使歸其家家人懼其自殞得禍于賊益使人守視賊具聘帛盛輿從來迎趙與家人訣曰吾不復歸此矣問其故答曰豈有爲賊污辱至此而尙有生理乎家人曰汝忍不爲家族計趙曰第無患遂涕泣登輿而去至州靡舉簾視之已自縊輿中死矣尙書屯田員外郎張寅有趙女詩

彭列女傳列女生洪州分寧農家從父泰入山伐薪父遇虎將不脫女拔刀斫虎奪其父而還事聞詔賜粟帛敕州縣歲時存問

郝節娥傳娥嘉州娼家女生五歲母娼苦貧賣于洪雅良家爲養女始笄母奪而歸欲令世其娼娥不樂娼日逼之娥曰少育良家習織作組紉之事又輒精巧粗可以給母朝夕欲求此身使終爲良可乎母益怒且箠且罵洪雅春時爲蠶叢祠娼與邑少年期因蠶叢具酒邀娥娼與娥徐往娥見少

年倉皇驚走母挽掣不使去不得已留坐中時時顧酒食輒唾強飲之則嘔噦滿地少年卒不得侵
凌暮歸過鷄鳴渡娥度他日必不可脫陽渴求飲自投於江以死鄉人謂之節娥云

任夢臣傳夢臣任西川路提點刑獄以廉節臥病不起家徒四壁有二女賢甚趙清獻守成都率僚
屬以俸助之二女辭不受曰豈敢污先君清德既行以原物贖於門壁付之守吏二女潔清如此清
獻以子姓娶之

類書纂要宋祝景先子確女妻朱松生晦翁景先兄女妻汪勃位至樞密確弟砿女妻汪勃之子作
礪位至提刑故其鄉人謂祝女位最高又祝堯臣者景先第八子盤之子也常奇第三女曰雖家貧
不與凡子堯臣卒後與呂午成婚兩窮相值越七年而午復中第於是祝女位高之語復喧傳於鄉
閭

小學善行篇呂滎公張夫人待制諱盥之之幼女也最鍾愛然居常至微細事教之必有法度如飲
食之類飯羹許更益魚肉不更進也時張公已爲待制河北都轉運使矣及夫人嫁呂氏夫人之母
申國夫人姊也一日來視女見舍後有鍋釜之類大不樂謂申國夫人曰豈可使小兒輩私作飲食

壞家法邪其嚴如此

貴耳集蜀士胡其姓者知其女貴能生子作宰相攜入京師尋一朝士生宰相者卽與之道間遇見韓光祿國華拜於馬首云三年在京師閩人多矣光祿必生宰相子敢以女爲獻後果生魏公今韓氏家廟有胡夫人卽斯人女也

話腴南康縣外二十里許有劉氏女少而慧父母初以許蔡無故絕蔡而許吳吳亡又以許蔡女曰吾一身而三許人何顏登人門戶投潭水而死鄉社立賢女祠今存焉

聞見前錄章獻明肅太后成都華陽人少隨父下峽至玉泉寺有長者善相人謂其父曰君貴人也及見后則大驚曰君之貴以此女故又曰遠方不足留盍遊京師乎父以貧爲辭長者贈以中金百兩后之家至京師眞宗判南衙因張耆納后宮中帝卽位爲才人進宸妃仁宗卽位以太皇太后垂簾聽政

宣政雜錄政和中濟南府禹城縣孝義村崔志有女甚孝母臥病久冬忽思魚食而不可得其女曰聞昔者王祥臥冰得魚想不難也兄弟皆曰盡信書則不如無書汝女子何妄論古今女曰不然父

母有兒女者本欲養生送死兄謂女不能邪乃同乳媼焚香誓天卽往河中臥冰凡十日果得魚三尾鱗鬣稍異歸以饋母食之所病頓愈人或問方臥冰時曰以身試冰殊不覺寒也

清尊錄崇寧中有王生者貴家之子也隨計至都下嘗薄暮被酒至延秋坊過一小宅有女子甚美獨立於門徘徊徙倚若有所待者生方注目忽有騶騎呵衛而至下馬於此宅女子亦避去忽忽遂行初不暇問其何姓氏也抵夜復過其門則寂然無人聲循牆而東數十步有隙地丈餘蓋其宅後也忽自內擲一瓦出拾視之有字云夜於此相候生以牆上剝粉戲書瓦背云三更後宜出也復擲入焉因稍退十餘步伺之小頃一男子至周視地上無所見微嘆而去旣而三鼓月高霧合生亦倦睡欲歸矣忽牆門軋然而開一女子先出一老媼負笥從後生遽就乃適所見立門首者熟視生愕然曰非也回顧媼媼亦曰非也將復入生挽而刳之曰汝爲女子而夜與人期至此我執詣官醜聲一出辱汝門戶我邂逅遇汝亦有前緣不若從我去女泣而從之生攜歸逆旅匿小樓中女自言曹氏父早死獨有己一女母鍾愛之爲擇所歸女素悅姑之子某欲嫁之使乳媼達意於母母意以某無官弗從遂私約相奔牆下微嘆而去者當是也生旣南宮不利遷延數月無歸意其父使人詢之

頗知有女子偕處大怒促生歸扇之別室女所齋甚厚大半爲生費所餘與媼坐食垂盡使人訪其母則以亡女故抑鬱而死久矣女不得已與媼謀下汴訪生所在時生侍父官閩中女至廣陵資盡不能進遂隸樂籍易姓名爲蘇媛生游四方亦不知女安否數年自浙中召赴闕過廣陵女以倡侍燕識生生亦訝其似女屢目之酒半女捧觴勸不覺兩淚墮酒中生悽然曰汝何以至此女以本末告淚隨語零生亦媿歎流涕不終席辭疾而起密召女納爲側室

齊東野語陳孝女錢塘人也父業儒嘗受勇爵漫游江淮間居胭脂嶺下家粗給乙亥兵火挈家永嘉山中悉爲盜所掠僅留一女十歲攜之丐食以歸故居蕩不復存因寄五里塘舊僕家聞殊勝寺設粥供日攜女子就寺丐食凡數月僧扣所以頗憐之俾留寮寮供榜疏職時孫元帥下李知事者東平人也頗知書亦寓寺旁暇日至寺必從容與僧談欲謀一士爲友僧以陳爲薦一見投合如久要館穀加厚其女亦得其家歡心居數月當丁丑仲春女子忽謂其父云吾母墓在故居側數年不至矣聞主人禁煙將爲湖山遊能乘此機一往拜埽否父以告李欣然與俱旣至墓所拜奠罷李偕攜酒飲舍旁女悲泣不已久之勉之還則泣告曰比聞李氏今將北歸吾父子必將從之父老子幼

南北萬里何日可再至吾母墓下此所以痛也言與淚俱下父亦感痛而女蹙踊呼號聲振林木久而仆地視之死矣李義之因與墓鄰斂而耐於母塚之旁云

慈明楊太后養母張夫人善聲伎

隨夫之蜀至儀真長蘆寺前僦居主僧善相適出見之知其女當貴因招其父母飯語之故且勉之往行都當有所遇以無資告僧以二千楮假之遂如杭或導之入慈福宮爲樂部頭后方十歲以爲則劇孩兒憲聖尤愛之舉動無不當后意有嫉之者適太皇入浴儕輩俾服后衣冠爲戲因譖之后后笑曰汝輩休驚他將來會到我地位上在其後茂陵每至后所必目之后知其意一日內宴因以爲賜且曰看我面好好看他傳伯壽草立后制有云洪惟太母念我文孫美其冠於後庭俾之見於內殿蓋紀實也旣貴恥其家微陰有所遺而絕不與通密遣內璫求同宗遂得右庠生嚴陵楊次山以爲姪旣而宣召入見次山言與淚俱且指他事爲驗或謂皆后所授也后初姓某至是始歸姓楊氏焉次山隨卽補官循至節鉞郡王云

楊和王最所鍾愛者第六女性極賢淑初事趙汝勅繼事向子豐居於雪未有所育王甚念之一日向妾得男楊氏使祕之以爲己出且亟報王王喜甚卽請告命輕舟往視之向氏家知王來良窘無策以泥其行時王以保寧昭慶兩鎮節鉞領殿巖於湖

爲本鎮子豐因使人諷郡官往迓之自郡將以次皆屬橐鞬謹伺於界首王初以人不知其來及是聞官吏郊迎深恐勞動多事遂中道而返因厚以金繒花果以遺其女且撥吳門良田千畝以爲粥米逮今向氏家有崑山粥米莊云此事得之向氏子孫

玉照新志鄭紳者京師人少日以賓贊事政府坐累被逐貧窶之甚妻棄去適他人一女流落官寺家不暇訪其生死日益以困偶往相監問命於日者日者驚曰後當官極品未論其他而今已爲觀察且喜在今日君其識焉同行儕輩笑且排之甫出寺門有快行家者數輩宣召甚急始知其女已入禁中得幸九重矣卽除閣門宣贊舍人未及歲以女正長秋拜廉察不數年位登師垣爵封郡王極其富貴榮寵妻再適張公縕賁緣肺腑亦至正任承宣使韓髻斯士鄭氏壻也見語如此

癸辛雜識慈憲全夫人之生也其父全翁大節忽門外有大蛇蟠繞一大樹間細而視之則其蛇有兩小角方以爲異將入呼兒姪輩逐之則報以得女而蛇不復見矣

金史阿魯眞傳阿魯眞宗室承充之女胡里改猛安夾谷胡山之妻夫亡寡居有衆千餘興定元年承充爲上京元帥上京行省太平執承充應蒲解萬奴阿魯眞治廢壘脩器械積芻糧以自守萬奴

使人招之不從乃射承充書入城阿魯真得而碎之曰此詐也萬奴兵急攻之阿魯真衣男子服與其子蒲帶督衆力戰殺數百人生擒十餘人萬奴乃解去後復遣將擊萬奴兵獲其將一人詔封郡公夫人子蒲帶視功遷賞

金氏傳金氏詳定使四明程徐妻也京城既破謂其女曰汝父出捍城我三品命婦汝儒家女又進士妻不可受辱抱二歲子及女赴井死

顯宗皇后徒單氏傳后父貞尙遼王宗幹女梁國公主后性莊重寡言父母嘗令總家事細大畢辦諸男不及也后素謙謹每畏其家世崇寵見父母流涕而言曰高明之家古人所忌願善自保持其後果以海陵事敗蓋其遠慮如此

蕭玉傳玉從蕭裕誣宗本罪海陵喜甚數月爲參知政事俄授猛安子尙公主海陵謂玉曰朕始得天下常患太宗諸子方強賴社稷之靈卿發其姦朕無以報此功使朕女爲卿男婦代朕事卿也賜第一區分宗本家貲賜之

孔彥舟傳彥舟荒於色有禽獸行妾生女姿麗彥舟苦虐其母使自陳非己女遂納爲妾

擣盪溫敦思忠傳思忠爲行臺尙書丞贊謨爲行臺參知政事兩人交惡思忠因搆謨殺之遂納其妻曹氏盡取其家財產章宗卽位贊謨女五十九乞改葬詔賜葬地於懷州并以思忠原取家貲付之

聶孝女傳女字舜英尙書左右司員外郎天驥之長女也年二十三適進士張伯豪伯豪卒歸父母家及哀宗遷歸德天驥留汴崔立劫殺宰相天驥被創甚日夜悲泣恨不卽死舜英謁醫救療百方至刲其股雜他肉以進而天驥竟死時京城圍久食盡閭巷間有嫁妻易一飯者重以崔立之變剽奪暴陵無復人理舜英頗讀書知義理自以年尙少艾夫旣亡父又死非命比爲兵所污何若從吾父於地下乎葬其父之明日絕脰而死一時士女賢之有爲泣下者其家以舜英合葬張伯豪之墓元史巴而朮阿而忒的斤傳亦都護者高昌國主號也至元三年世祖命火赤哈兒的斤嗣爲亦都護十二年都哇卜思巴等率兵十二萬圍火州聲言曰阿只吉奧魯只諸王以三十萬之衆猶不能抗我而自潰爾敢以孤城當吾鋒乎亦都護曰吾聞忠臣不事二主吾生以此城爲家死以此城爲墓終不能從爾也受圍凡六月不解都哇以書繫矢射城中曰我亦太祖皇帝諸孫何以不附我且

爾祖嘗尙公主矣爾能以女與我我則休兵不然則急攻爾其民相與言曰城中食且盡力已困都哇攻不止則相與俱亡矣亦都護曰吾豈惜一女而不以救民命乎然吾終不能與之相見以其女也立亦黑迷失別吉厚載以茵引繩縋城下而與之都哇解去

趙弘毅傳弘毅字仁卿大明兵入京城弘毅與妻解氏子恭自縊死恭女官奴年十七見恭死方大泣適鄰嫗數輩來相牽出避曰我未適人避將何之不聽嫗欲力挽之女曰人生在世便百歲亦須一死乃潛入中堂解衣帶自經

李智貞傳智貞建寧浦城人父子明無子智貞七歲能讀書九歲母病調護甚謹及卒哀慟欲絕不茹葷三年治女工供祭祀及奉父甘旨不乏鄉里稱爲孝女

朱淑信傳淑信山陰人少寡誓不再嫁一女妙淨幼哭父雙目並失明及長擇偶者不至家貧歲凶母子相依以苦節自厲士人王士貴重其孝乃求娶焉

蔡三玉傳三玉龍溪陳端才妻也盜起漳州掠龍溪父廣瑞與端才各竄去三玉獨偕夫妹出避難祠中盜入斫夫妹見三玉美不忍傷與里婦歐氏同驅納舟中行至柳營江迫妻之三玉佯許諾因

起更衣自投江水而死越三日屍流至廣瑞舟側廣瑞識爲女收斂之歐氏脫歸言狀有司高其操爲請表之乃命旌門復役仍給錢以葬

周如砥女傳女年十九未適人至正二十年鄉民作亂如砥與女避於邑西之客僧嶺女爲賊所執賊曰吾未娶當以汝爲妻女曰我周典史女也死卽死豈能從汝耶賊遂殺之如砥時爲紹興新昌典史

姚氏傳姚氏餘杭人居山谷間夫出刈麥姚居家執爨母何氏往汲澗水久而不至俄聞覆水聲亟出視則虎銜其母以走姚倉卒往逐之卽以手毆其脇鄰人競執器械以從虎乃置之而去姚負母以歸求藥療之奉養二十餘年而卒

張氏女傳女高郵人城亂賊知張女有姿艷叩其家索之女方匿複宇間賊將害其父母女不得已乃出拜賊賊卽伏地呼其父母爲丈人媼而以女行女欣欣然從之過橋投水死

劉氏二女傳二女長曰貞年十九次曰孫年十七龍興人皆未許嫁陳友諒寇龍興其母泣謂二女曰城或破置汝何所二女曰寧死不辱父母也城陷二女登樓相繼自縊婢鄭奴亦自縊